

HOËRSKOOI



VREDENDAL

Posbus 185
VREDENDAL
8160
Tel: 027 213 1050
Faks: 027 213 1050

Grensstraat 8
VREDENDAL
8160
admin@hsvdal.co.za
skoolhoof@hsvdal.co.za

24 Februarie 2023

Uit die kantoor

Ons wil graag Hoërskool Vredendal se Visie en Missie weer met ons ouers, leerders en skoolvriende deel. Hierdie is die beginsels wat ons as skool nie net nastreef nie, maar ook ten alle tye uitleef. Daar sal ook teen enige persoon verbode aan die skool wie se optrede of gedrag teenstrydig hiermee is, opgetree word.

Ons Visie

Hoërskool Vredendal is 'n skool:

- *wat onderrig van hoogstaande gehalte bied;*
- *wat kreatiewe denke, selfstandigheid, selfvertroue en empatie by elke leerder aanmoedig en ontwikkel;*
- *wat leerders toerus om alle uitdagings met vasberadenheid en vertroue aan te durf;*
- *waar ons mekaar ondersteun en*
- *waar ons geesdriftig deelneem aan akademiese, sport en kultuur omdat ons kan en wil.*

Ons Missie

Hoërskool Vredendal strewende daarna om:

- *ons Afrikaans Moedertaal te handhaaf en goeie waardes uit te leef;*
- *eie kultuurskatte te waardeer, maar ook dié van ander te respekteer;*
- *'n weldaardige, goedgebalanseerde opvoeding aan jong wêreldburgers te bied en*
- *te alle tye aan ons integriteit, trots en uitnemendheid geken te word.*

Personeel

Daar is baie ouers en leerders wat die personeel na-ure om akademiese redes kontak. Hoewel die personeel meer as bereidwillig is om ekstra hulp te verleen, wil ek tog vra dat hulle privaatheid en tyd ook in ag geneem en gerespekteer word en dat geen personeellid na 18:00 saans en oor naweke gekontak word nie.

Valentynsbal

Terwyl die oorgrote meerderheid van ons kinders ten alle tye goeie gedrag openbaar en hulle samewerking gee, was daar leerders wat tydens die Valentynsbal alkohol op die skoolgronde ingebring het. Sulke gedrag is onaanvaarbaar en teenstrydig met alles waarvoor ons as skool staan. Hierdie betrokke leerders is dus ook dienooreenkomstig gestraf.

Wat vir ons ook teleurstellend is, is dat 'n hele klomp leerders van die voorval bewus was en dit nie die aand gerapporteer het nie.

Aangesien daar van ons kinders verwag word om verantwoordelik op te tree en deel van die verantwoordelikheid is om enige onvanpaste optredes van ander te rapporteer, is daar besluit dat daar geen sokkies in die tweede kwartaal gehou sal word nie.

Dagga as dwelmmiddel

Na die laaste hofuitsprake en die aanpassing in die wetgewing oor die gebruik van dagga is daar tans landswyd onsekerheid oor dagga as dwelmmiddel.

Hoewel die wet nou bepaal dat dit wettig is vir 'n persoon ouer as 18 om dagga te gebruik, is die wet baie duidelik oor die volgende:

Die gebruik van dagga is **nie** toelaatbaar in die openbaar, in die teenwoordigheid van kinders of in die teenwoordigheid van nie-toestemmende volwasse persone **nie**.

Enige skool word beskou as 'n openbare gebied waar minderjariges teenwoordig is. Die gebruik of besit van dagga op skoolgronde bly dus steeds onwettig en enige persoon wat hom-/haarself hieraan skuldig maak, kan steeds deur die polisie gearresteer word.

Hoërskool Vredendal se standpunt en siening rakende dagga is baie eenvoudig: Indien daar 'n vermoede is dat 'n persoon dagga op die skoolterrein in sy/haar besit het, sal die SAPD versoek word om sodanige persoon te arresteer en te verwyder.

Valentynsbal

Op 16 Februarie het ons die liefde met ons jaarlikse Valentynsbal gevier. Die jong dames en here het omtrent spoggerig gelyk en die saal en dekor was ongelooflik! Dankie aan almal wat 'n handjie bygesit het om die aand 'n sukses te maak.



Krieket

Op Donderdag, 16 Februarie speel 'n gemengde o/19B-span tuis teen Calvinia. Een van ons jong opkomende dogters, Lenay Schade, kry ook geleentheid om te speel en vaar baie goed.

Ons wen die loot en stuur Calvinia in om eerste te kolf. In hul toegelate 20 beurte teken Calvinia 78 lopies aan. Ons beste boulders was WJ van Wyk 3 beurte 3 paaltjies vir 5 lopies, Sebastian Nel 3 beurte 2 paaltjies vir 4 lopies en WJ Weideman 3 beurte 2 paaltjies vir 14 lopies. Ons openingskolwers skop goed af, maar verloor vroeg hul paaltjies en na 'n insinking in die middelorde verloor ons kwaai momentum en word ongelukkig vir 33 lopies uitgeboul. Janco Havenga blink met die kolf uit en teken 14 lopies aan.

Baie geluk aan Calvinia en sterkte aan ons span met hul volgende wedstryd.



Op Dinsdag, 21 Februarie speel ons o/19B-krieketspan teen Hoërskool Lutzville te Lutzville . Vredendal sluit vir die eerste keer in die skool se geskiedenis twee dogters, Lenay Schade en Iné van Zyl, in hul span in .

Vredendal wen die loot en stuur Lutzville in om eerste te kolf. In hul toegelate 20 bouldbeurte teken Lutzville 71 lopies aan. WJ van Wyk neem 3 paaltjies en Lenay Schade 'n eerste paaltje deur 'n dogter. Vredendal vaar goed met die kolf en behaal die wenlopies in die 17 bouldbeurt met slegs 3 paaltjies plat. Vredendal se beste kolwers was Janco Haveng (21 Lopies) en Aiden van Biljon (18).



Baie geluk aan die volgende krieketspelers wat gekies is om Noordwes-Boland te verteenwoordig teen Wes-Boland op Sondag, 26 Februarie en Sondag 5 Maart.

o/19-seuns

Johannes van Zyl, Christiaan van Zyl, Derrick van der Westhuizen, Theunis Roux, Christivan Fryer, Franco van Zyl en Khyle Machelm.

o/16-seuns

Juan-Lee Le Roux, Janco Havenga, Sebastiaan Nel en MJ Owies.

Atletiek

Op 14 Februarie het ons saam met Hoërskool Lutzville en Augsburg deelgeneem aan die jaarlikse Driehoekbyeenkoms te Clanwilliam. Tydens hierdie byeenkoms het ons atlete baie goeie presteer en is die volgende pretasies behaal:

Goud 27

Silwer 25

Brons 25

Ons aflosspanne vaar baie goed. 8 aflosspanne neem deel. Ons verower 5 goue medaljes en 3 silwermedaljes. Ons word ook as wenners van die Driehoekbyeenkoms aangewys.

Ons wil graag vir alle atlete wat deelgeneem het baie geluk sê. Dankie ook aan die toeskouers wat ons atlete ondersteun het.



Tennis

Ons tennisseisoen is Woensdag, 22 Januarie, afgesluit met die speel van die ligafinale teen Lutzville. Beide die eerste en tweede seuns – en dogterspanne was betrokke.

Die seuns eerstespan het hulle baie suksesvolle seisoen op 'n hoogtepunt afgesluit deur Lutzville oortuigend met 6 – 0 te klop . Die tweede seunspan was nie ver agter nie en klop Lutzville 5 – 1.

Die dogterspanne was 'n klein bietjie onder druk deurdat beide spanne se nommer een speler nie kon speel nie. Tog toon hulle karakter en wen die eerstespan onder moeilike omstandighede 4 -2. Die tweede dogterspan het tot die einde moedig geveg, maar verloor ongelukkig 4 -2.

Ons seisoen is nie net gekenmerk deur ons goeie liga-uitslae nie, maar daar was beslis 'n oplewing by die tennis. Ongeveer 50 kinders het weekliks tennis geoefen en lyk die toekoms goed.

Vir die topspelers sal daar ook gedurende die volgende twee kwartale aangegaan word met tennisoefeninge een maal per week, terwyl voorsiening gemaak sal word vir enige leerder wat op hulle eie wil aangaan.

As afrigters sê ons dankie aan elke speler wat so getrou op hulle pos was. Ook baie dankie aan die graad 12-groep wat hulle laaste seisoen beleef het en deur die jare die skool se naam uitgedra het.



Rugby

Ons rugbyseisoen het op Maandag, 20 Februarie afgeskop met n massa-oefeningsessie en worsbraai.

Die geleentheid is gereël deur die nuutgestigte Dallerbond in samewerking met ons sport-organiseerder, Zandré Jordaan.

Na 'n sopnat oefening is die nuwe afrigters bekendgestel waarna die Dallerbond hul visie en doel vir die seisoen verduidelik het.

Baie dankie aan die personeel en ouers vir hul ondersteuning. Dit was n lekker begin vir n opwindende seisoen!!!



Hoërskool Vredendal die tuiste van Trotse Dallers.